



Novembar 2015. • List RMU "BANOVIĆI"
DIJELI SE BESPLATNO

Broj
73

RUDAR




**TERMoeLEKTRANA
BANOVIĆI:
PREDSTAVNICI
FEDERALNE
I KANTONALNE
VLADE U POSJETI
RUDNIKU**

**PROIZVODNJA:
U OKTOBRU
PREBAČEN
PROIZVODNI PLAN
NA UGLJU**

**IZGRADNJA KUĆA:
STAMBENO ZBRINUTE
PORODICE STRADALE
U ELEMENTARNIM
NEPOGODAMA**

ODRŽAN SASTANAK NA TEMU PROJEKTA IZGRADNJE
TERMOLJEKTRANE U BANOVIĆIMA

NOVALIĆ, GUTIĆ, JAŠAREVIĆ: “PROJEKAT TERMOLJEKTRANE U BANOVIĆIMA OD DRŽAVNOG ZNAČAJA”



Jedan od najvećih energetskih projekata na području BiH u posljednje vrijeme svakako je izgradnja termoelektrane u Banovićima. Na projektu se ubrzano radi, a sve je izvjesnije da će kamen temeljac biti zakopan već polovinom naredne godine. Da je ovo trenutno jedan od najspremnijih projekata i da ima potpunu podršku kantonalne i federalne vlasti potvrđeno je i na sastanku održanom u petak u direkciji Rudnika. Sastanku su prisustvovali federalni premijer Fadil Novalić, premijer tuzlanskog kantona Bego Gutić, te menadžment Elektroprivrede i rudnika Banovići.

Glavna tema razgovora bila je izgradnja termobloka u Banovićima, kao i aktivnosti koje je potrebno završiti do konačnog potpisivanja ugovora, ali i odnos Elektroprivrede i Rudnika Banovići.

Rudnik Banovići uradio je kompletnu investiciono-tehničku i okolinsku dokumentaciju, napravio rang listu i izabrao kinesku kompaniju Dongfang Electric Corporation (DEC) kao najpovoljnijeg ponuđača, za šta je dobio zeleno svjetlo od strane Vlade i Parlamenta FBiH.

Ono što slijedi je potpisivanje ugovora sa bankom, ugovora o vođenju i održavanju bloka, ugovora o prodaji struje, nakon čega će se nesmetano krenuti u daljnju realizaciju projekta.

- Za očekivati je da ćemo aplikaciju banci podnijeti najkasnije do polovine januara 2016. godine, koja će se razmatra dva do tri mjeseca, što znači da bi već

polovinom aprila imali sve potrebne ugovore, čime bi završili kompletnu proceduru izbora Strateškog partnera za izgradnju i finansiranje Termoelektrane Banovići blok 1-350 MW. Za projektну dokumentaciju potrebno je oko šest mjeseci, te bi se krajem oktobra slijedeće godine mogao zakopati kamen temeljac buduće termoelektrane, rekao je direktor RMU “Banovići” Munever Čerčić.



Na sastanku je bilo riječi i o samom značaju ovog projekta za općinu Banovići, Kanton pa i državu.

Premijer Bego Gutić, smatra da se u TK trenutno realizuju najveći investicioni projekti na Balkanu, te da će oni biti glavni pokretači za druge investicione projekte. Od gradnje nove termoelektrane očekuje višestruke efekte koji se prvenstveno ogledaju u podizanju narušene građevinske i metalne industije TK. Naveo je da je kineska kompanija obavezna angažovati domaći sektor sa najmanje 20% od ukupne vrijednosti projekta, pa će veliku ulogu odigrati i tuzlanske firme.

Iako će Banovići u skorijoj budućnosti proizvoditi svoju struju i koristiti svoje energetske resurse, neće biti ugrožen ni rad Termoelektrane Tuzla.

- Izgradnja bloka termoelektrane u Banovićima neće ugroziti rad bloka 6 Termoelektrane Tuzla. Narednih mjeseci bit će urađen plan potreba tuzlanske Termoelektrane za ugljem iz Rudnika Banovići, kazao je su Bajazit Jašarević generalnog direktora Elektroprivrede Bosne i Hercegovine.

Jašarević je dodao i to da će Parlament dati saglasnost za izgradnju blokova, a da će Federacija BiH biti garant prema kineskim partnerima.

Poznato je da će buduća termoelektrana biti u vlasništvu Federacije BiH, odnosno rudnika „Banovići“, pa je podrška te strane itekako bitna. Da nije izostala potvrđuje i sama posjeta premijera Novalića, koji je došao na lice mjesta pružiti podršku provedenim aktivnostima ali i javnosti dati svoje mišljenje o značaju samog projekta na cjelokupnu industriju BiH.



- Građani mogu očekivati nezavisnost u energetskej industriji, koja je ugrožena zbog starosti objekata. Došlo je vrijeme za gradnju novih, zamjenskih blokova, koji će biti u skladu sa evropskim zahtjevima. Za istu količinu proizvedene energije trošit će se manje energetske resursa, ali i manje zagađivati okolina. Ovim projektom Tuzla bi se mogla osloboditi privredne depresije - rekao je Novalić.

Dodao je da bi sve ovo moglo značajno uticati na problematičnost tuzlanskih firmi, prvenstveno misleći na TTU koji bi trebao imati posla pri izgradnji termoelektrane.

Gradnja termoelektarne, koja zadovoljava sve evropske standarde, osigurat će plasman uglja u narednih 40 godina, probuditi nova privredna kretanja, obezbijediti jeftiniju struju, te znatno povećati zaposlenost.



TERMOELEKTRANA BANOVIĆI

IZBOR STRATEŠKOG PARTNERA, SPORAZUM O STRATEŠKOJ SARADNJI I EPC UGOVOR DOBILI SAGLASNOST VLADE I PARLAMENTA FBiH

Vlada i Parlament FBiH u proteklom periodu dali su saglasnost na izbor Strateškog partnera, predloženi Sporazum o Strateškoj saradnji između RMU „Banovići“ i kompanije Dongfang Electric Corporation (DEC), te na predloženi Ugovor o inžinjeringu, nabavci i izgradnji – EPC ugovor (po sistemu „ključ u ruke“).

Konačnu riječ dala je Skupština Društva 20.11.2015. godine. Na sjednici Skupštine takođe je potvrđena Odluka o izboru Strateškog partnera Dongfang Electric Corporation, te donešena Odluka o davanju saglasnosti Skupštine Društva na prijedlog Sporazuma o strateškoj saradnji između RMU „Banovići“ d.d. Banovići i kompanije Dongfang Electric Corporation, te prijedlog Ugovora o inžinjeringu, nabavci i izgradnji – EPC ugovor.

Ključ ka daljnjoj izgradnji strateški važnog projekta za BiH, termoelektrane Banovići, održat će se krajem novembra na Samitu 16+1 u Pekingu pod pokroviteljstvom Narodne Republike Kine, kada će biti i potpisan pomenuti Sporazum i Ugovor između izabrane kineske kompanije i Rudnika.

Na Samitu će učestvovati predstavnici Vlade 16 zemalja, uključujući i predstavnike Vlade FBiH, kao i predstavnike rudnika „Banovići“.

Obzirom da je projekat dobio punu podršku federalne i kantonalne Vlade do kraja godine očekuje se i potpisivanje Ugovora o gradnji sa DEC-om, a već polovinom naredne godine i početak izgradnje termobloka u vrijednosti od 405 miliona eura.



PROIZVODNJA UGLJA I OTKRIVKE

MAKSIMALAN ANGAŽMAN ZA OSTVARENJE PLANIRANIH CILJEVA

Mjesec oktobar donio je ozbiljno poboljšanje kada je u pitanju proizvodnja uglja, uzme li se u obzir da je u posljednjih nekoliko mjeseci u kontinuitetu bila ispod plana. Naime, u ovom mjesecu proizvedene su očekivane prekoplanske količine. Plan na proizvodnji uglja prebačen je za 6,26%, odnosno proizvedeno je 157.788,5 tona uglja, dok je otkrivka u ovom mjesecu išla ispod plana, realizovano je 848.765 metara kubnih čvrste mase.

Spomenuti nedostatak na proizvodnji uglja u prethodnim mjesecima posljedica je velikih remonta na Separaciji. Remontovala se mašina taložnica, mijenjala kamionska vaga i drobilica za sraslac.


O stvarnom stanju u proizvodnji i problematici s kojom se svakodnevno susreću, te o zacrtanim planovima do kraja godine, razgovarali smo sa upravicima pogona, direktnim učesnicima u proizvodnji uglja.



Sakib Omerkić, tehnički rukovodilac pogona „Separacija“ - Remonti na Separaciji obavljani u periodu od juna do septembra, te smo u ovom pogonu imali značajan i direktan uticaj na ostvarenje planirane proizvodnje. U tom periodu izvršen je djelimični remont mašine taložnice, odnosno njene prve komore. Problemi nisu u potpunosti otklonjeni djelimičnim remontom što dokazuju i svakodnevni sitni kavrovi koje nastojimo sanirati u najkraćem vremenskom roku. Osim remonta na mašini taložnici, završeno je i postavljanje nove kamionske vage, koje je trajalo više od mjesec dana. Kao posljedicu toga trenutno imamo velike redove kamiona koji čekaju na utovar, kazao nam je tehnički rukovodilac „Separacije“.

Takođe, naveo je da su ove gužve na utovaru samo trenutne, posebno zbog toga što je u ovom periodu povećana potražnja za ugljem, ali da će se stanje brzo normalizirati. Komentarišući urađene poslove, spomenuo je i čišćenje taložnih bazena za efikasniji rad prečišćavanja voda.

Mišljenja je da u narednom periodu ne bi trebalo biti dodatnih problema, te da je za normalno odvijanje tehnološkog procesa i ostvarenje planirane proizvodnje na Separaciji neophodna ispravnost postrojenja, redovna isporuka rezervnih dijelova i repromaterijala, te redovno održavanje mašinskih postrojenja.



Dr. Rasim Kovačević, tehnički rukovodilac „Površinske eksploatacije uglja“ - U razgovoru je istakao da je najviše problema na proizvodnji bilo u prva tri mjeseca tekuće godine zbog loših vremenskih uslova koji su direktno uticali na proizvodnju uglja i otkrivke, odnosno smanjili kapacitet proizvodnje za 20-30%. Stanje se u posljednja četiri mjeseca popravilo i proizvodnja ide preko plana.

- Površinski kop „Grivice“ zaostaje na otkrivci sa oko milion metara kubnih čvrste mase, prije svega zbog loših vremenskih uslova u prvom dijelu godine, ali i nedostatka pomoćne mehanizacije. I pored dosadašnjih poteškoća proizvodnja uglja sa ovog kopa treba krenuti u drugoj polovini mjeseca novembra i to sa nešto većim količinama, ističe Rasim Kovačević.

Nedostatak mehanizacije i transportnog sistema navodi kao najveći problem ovog pogona i faktor smanjene proizvodnje uglja. Svi ostali problemi i kvarovi, kako kaže, riješavali su se u toku same proizvodnje u sklopu održavanja.



Vahidin Aganović, tehnički rukovodilac „Podzemne eksploatacije uglja“ - Položaj mehanizovanog širokog čela trenutno je u rasjednoj zoni gdje je odnos uglja i kamena 74,5:25,5 metara, što se iz dana u dan mijenja. Povećava se učešće uglja, te bi se problem rasjeda u potpunosti trebao riješiti u narednih 40 metara, odnosno do mjeseca decembra ove godine, u razgovoru je istakao Aganović.

Mišljenja je da će do kraja godine procenat na proizvodnji uglja zadovoljiti planirane količine, bez obzira što je u proteklih deset mjeseci proizvodnja iznosila 92,5 u odnosu na plan. Da je koordinacija između pogona Rudnika veoma važna dokaz je i to što se tokom proizvodnje u rasjednoj zoni već u jami vrši odvajanje kamena od uglja u posebne bunkere zbog lakšeg oplemenjivanja uglja i manjih problema na Separaciji.

Uporedo sa radom na eksploataciji uglja aktivno se vrše i radovi na pripremi radilišta po predviđenoj tehničkoj dokumentaciji.

- Zbog nepostojanja neophodnih transportnih sredstava kasni se sa početkom istražnih radova u reviru Sjever. Iako su nam dopremljena dva grabuljasta transportera za njih još nije dostavljena tehnička dokumentacija, tako da ćemo po dostavljanju dokumentacije odmah krenuti u istražne radove, kaže Aganović.

PUŠTENA U RAD ČETIRI NOVA DAMPER KAMIONA

PRVE TONE UGLJA UTOVARENE UZ PRISUSTVO ČELNIKA KANTONA I OPĆINE



Povodom obilježavanja 10. septembra Dana općine Banovići upriličena je svečana sjednica Općinskog vijeća kojoj su prisustvovali mnogobrojni gosti i prijatelji. Svečanost je počela uz obraćanje čelnih ljudi Općine i bogat kulturno-zabavni program.

Po završetku sjednice domaćini, zajedno sa velikim brojem prisutnih zvanica, vozili su se trenutno jednom od najvećih atrakcija ovog podnevlja, turističkim vozom „Ćirom“. Ćiro ih je odvezao na površinski kop „Turija“, gdje je iskorištena slavljenička atmosfera da se u rad puste četiri nova damper kamiona. Ceremoniju su propratili brojni domaći i regionalni mediji. Na kopu je sve bilo spremno za presjecanje vrpce i za utovar prvih tona uglja. Investicijama i kontinuiranom razvoju Rudnika podršku su dali i prvi ljudi Kantona na čelu sa

premijerom Begom Gutićem i pojedini ministri Federacije BiH, koji su kroz svoja obraćanja upućivali samo riječi hvale kolektivu i ljudima odgovornim za njegov razvoj.

Posljednja nabavka kamiona Rudnik je koštala devet miliona konvertibilnih maraka, a prema riječima direktora Rudnika, produktivnost bi se trebala osjetiti već do kraja godine. Uključivanjem u rad novih kamiona očekuje se i ispunjenje godišnjeg plana, kao i proizvodna stabilnost na duži vremenski period.

Ključ razvoja dobrog preduzeća svakako je ulaganje u visokoproduktivnu opremu, koja pomaže u realizaciji i olakšavanju svakodnevnih poslova zaposlenih u Rudniku.

Nakon završetka predviđenog programa, vozači dampera spremno su dočekali ukrcavanje menadžmenta Rudnika i njihovih gostiju, te prvo puštanje u kop i utovar novih kamiona.

STAMBENO ZBRINUTI OŠTEĆENI U PROŠLOGODIŠNIM POPLAVAMA RADNICI RUDNIKA UPLATILI OKO 100.000 KM

Aktiviranjem brojnih klizišta poslije prošlogodišnjih poplava na području općine Banovići potpuno je uništeno jedanaest stambenih objekata. Nakon zbrajanja štete i utvrđivanja stanja odmah se krenulo u traženje rješenja za pogođene u nesreći. Prvi korak napravio je rudnik „Banovići“ prepisavši vlasništvo neizgrađenog građevinskog zemljišta na Općinu, iz razloga što Općina ne raspolaže takvom vrstom zemljišta. Dodijeljeno je dvanaest parcela isključivo namijenjenih za gradnju stambenih objekata u mjesnoj zajednici Banovići Selo. Međutim, to nije jedina pomoć Rudnika. U saradnji sa Općinskim načelnikom otvoren je namjenski račun na koji su između ostalih i uposlenici Rudnika izdvajali po nekoliko svojih zarađenih dnevnica. Da je akcija bila uspješna i da su se rudari i ovaj put solidarisali govori i cifra od 99.190 KM, uplaćenih iz Rudnika na namjenski račun Općine.

Novac za izgradnju došao je i od strane Federalnog Fonda za pomoć područjima nastardalim od prirodne nesreće, kao i od grupe manjih donatora. Ukupno je na namjenskom računu uplaćeno 356.697 KM. Ovaj iznos bio je dovoljan za stambeno zbrinjavanje jedanaest porodica, od kojih su se dvije opredjelile za kupovinu stambenih objekata, a devet na izgradnju kuća na općinskim parcelama. Međutim, unutrašnjost kuća nije završena, jer Općina trenutno ne raspolaže dodatnim sredstvima koja su za to potrebna.

- Svi korisnici pojedinačno potpisali su tripartitetni Ugovor sa općinom Banovići i Federalnim fondom za pomoć područjima nastradalim od prirodne nesreće. Ugovorom su definisane sve ugovorne obaveze u skladu sa pozitivnim zakonskim propisima, kazao je Amir Mrkonjić, predsjednik komisije.

Prilikom raspodjele sredstava postojali su određeni kriteriji na osnovu kojih je vršena podjela novca. Prema nezaposlenosti i socijalnom statusu, najugroženiji od njih dobio je 35.000 KM, a svi ostali po 25.000 KM. Tokom izgradnje kuća Fond je nametnuo određena pravila, po kojim se novac isplaćivao u tranšama, zavisno od faze završetka radova.

- Općina je uložila velike napore kako bi olakšala realizaciju ovih projekata, samim tim što se na samom početku zauzela za rješavanje papirologije i prikupljanje dozvola za gradnju za svakog korisnika, ubranu izgradnju pristupnih puteva i priključaka na mjesni vodovod. Sve aktivnosti provedene su da se što prije normalizuju uslovi života pomenutih korisnika, rekao je Mrkonjić.



SOLIDARNOST RADNIKA JAME

POMOGLI KOLEGI DA PRIJE ZIME USELI U KUĆU

Mirzet Čerčić i njegova porodica prvi ovogodišnji snijeg dočekat će u novoj kući, između ostalog zahvaljujući i svojim radnim kolegama. Da je prijateljstvo, kolegijalnost i solidarnost još uvijek prisutna među ljudima dokaz su banovički rudari. Naime, uposlenici jame „Omazići“ bez imalo razmišljanja pritekli su u pomoć svom kolegi, jer je u tom trenutku pomoć bila neophodna.



Mirzet živi u trošnoj kući i već godinama pokušava sagraditi svoj vlastiti dom. Kako danas nije nimalo lako obezbijediti sredstva za gradnju i kako svaka faza gradnje zahtijeva više novaca, proces useljenja se prilično oduljio. Vidjevši lošu situaciju u kojoj se nalazi njihov kolega, grupa od dvanaest rudara naizmjenično je krenula u akciju. Obzirom da i sami nisu u mogućnosti finansijski pomoći, odlučili su se na drugu vrstu pomoći. Oprobali su se u ulozi majstora. Među njima bilo je onih koji su malterisali, krečili i kompletno sredili unutrašnje zidove prvog sprata kuće. Bilo je i onih koji su u tome pripomagali i odrađivali pripreme radove, a sve kako bi njihov kolega uštedio na plaćanju majstora. Problem im nije predstavljalo ni to što su svoje slobodne dane ipak provodili radno to im je bilo lično zadovoljstvo, znajući da će Mirzetova peteročlana porodica prije prvog snijega useliti u novu kući.

Kako je posao odrađen imali smo priliku uvjeriti se na licu mjesta, kada smo i razgovorali sa njim. Iako nije bio pertjerano rječit tokom razgovora, beskrajno se zahvalio svojim prijateljima na pomoći, svjestan da bi za svaki taj posao morao dodatno platiti. Po useljenju obećao im je i skromno druženje, kako bi se na taj način djelimično odužio za veliku uslugu.

Bilo kako bilo, rudari su još jednom pokazali najbolju ljudsku osobinu, solidarnost i spremnost za pomoć, iako i njima samima često nije lako, obzirom da obavljaju jedan od najtežih poslova.

DOBROVOLJNA AKCIJA DARIVANJA KRVI

NA POSLJEDNJOJ OVOGODIŠNJOJ AKCIJI 107 RUDARA DAROVALO KRV

Poznato je da banovički rudari prvi staju u red kada je u pitanju neki humani gest i pomoć drugima, tako je bilo i ovaj put. Odazivom na dobrovoljnu akciju darivanja krvi organizovanu u Rudniku „Banovići“ zabilježen je rekordan broj davaoca, pridružilo se čak 107 rudara.

Četrnaestog oktobra od 10 sati prijemna prostorija jame „Omazići“ bila je mala za sve one koji su željeli učestvovati u ovoj akciji. Rudari nikad ne traže razlog za odaziv na humanitarne akcije, kako kažu, dovoljna je činjenica da to nekome može pomoći, u ovom slučaju možda i spasiti život.

U do sada organizovane tri ovogodišnje akcije darivanja krvi u Rudniku ukupno je učestvovalo preko tristo rudara, što je svakako vrijedno pohvale. Pohvale stižu i iz Crvenog križa općine Banovići, koji navode da zahvaljujući ovakvim akcijama postoje dovoljne količine krvi.

Iako je ovo posljednja akcija darivanja krvi u ovoj godini, ne dovodi se u pitanje njen nastavak u narednim godinama, bar kada su u pitanju rudari. Neki od njih su već sada krv darovali preko sto puta, a neki će sačekati narednu godinu da taj broj upišu u svoju karticu.





KONSTITUISAN NOVI NADZORNI ODBOR RMU „BANOVIĆI“

PODRŠKU SKUPŠTINE DOBILI DOSADAŠNJI VRŠIOCI DUŽNOSTI NADZORNOG ODBORA

Odlukom Skupštine rudnika „Banovići“ u naredne četiri godine nadzor nad Društvom ispred državnog kapitala vršit će mr. Emin Haračić i dr. Rasim Kovačević, a ispred malih dioničara Antun Luburić. Na konstituirajućoj sjednici održanoj 05. oktobra za predsjednika Nadzornog odbora RMU „Banovići“ d.d. Banovići izabran je mr. Emin Haračić.

Izabrani članovi Nadzornog odbora prethodna tri mjeseca obavljali su ovaj posao u funkciji vršioca dužnosti, te su vrlo detaljno upoznati sa načinom rada, poslovanjem i problematikom u Rudniku.

SARADNJA SA MINISTARSTVOM ZA BORAČKA PITANJA

NA STRUČNOM OSPOSOBLJAVANJU DVADESET I OSAM PRIPRAVNIKA

U okviru projekta Ministarstva za boračka pitanja Tuzlanskog kantona rudnik „Banovići“ svoja vrata otvorio je za dvadeset i osam pripravnika volontera sa visokom stručnom spremom.

Oni koji su se našli na konačnoj listi Ministarstva za boračka pitanja, a koji su raspoređeni da volonterski staž obavljaju u Rudniku, dvanaestog oktobra pozvani su na sastanak u prostorijama Direkcije, nakon čega su i raspoređeni na svoja radna mjesta. Tokom dvanaest mjeseci, koliko traje volonterski staž, svoje stručno usavršavanje steći će uz pomoć mentora koji su im prethodno određeni. Ovi mladi ljudi, različitih stručnih zvanja usko vezanih za rudarsku djelatnost, konačno će svoje prethodno znanje primijeniti u praksi i na taj način steći potrebno iskustvo.

Nakon prvobitnih 215 volontera koji su se našli na konačnom spisku Ministarstva za boračka pitanja, njih 43 iskustvo će steći na području općine Banovići, a

dotatnim odobrenjem Ministarstva taj broj se povećao za 17 volontera, raspoređenih po različitim ustanovama na području Općine.

Ovo je treći po redu program sufinansiranja obavljanja volonterskog staža boraca i članova njihovih porodica, a za cilj ima stručno usavršavanje, sticanje radnog iskustva, prava na polaganje stručnog ispita, te u konačnici konkurentnost na tržištu rada.





“RUDARIJADA 2015”

SVEUKUPNI POBJEDNICI RMU “BANOVIĆI” D.D. BANOVIĆI

U organizaciji Samostalnog sindikata rudara FBiH održano je sportsko takmičenje pod nazivom “Rudarijada 2015”, čiji domaćini su bili Rudnici soli i “Rudar” d.o.o Tuzla. Manifestaciju je otvorio premijer Tuzlanskog kantona Bego Gutić, a prisutnima su se obratili i direktori Rudnika soli i Rudara d.o.o. Tuzla, kao i predsjednik Samostalnog sindikata FBiH Safer Mušanović. Učesnicima su poželjeli dobru zabavu i mnogo sportske sreće.

Na otvaranju “Rudarijade” tradicionalnim igrama prisutne su zabavili i mališani iz KUD-a “Priluk”.

Takmičilo se osam ekipa u šest sportskih disciplina i to: mali nogomet, odbojka za žene i muškarce, stoni tenis, povlačenje konopca, šah i pikado.

Sveukupni pobjednici “Rudarijade” su RMU “Banovići” d.d. Banovići, sa osvojena četiri prva mjesta u različitim sportskim kategorijama. Najboljima su se pokazali u odbojci za žene, stonom tenisu, povlačenju konopca i pikadu.

Nagrada za far play otišla je u ruke gostujućim ekipama, Rudarskom fakultetu Tuzla i “Geoservis” d.o.o. Živinice.

U večernjim satima, po zavšetku takmičarskog djela organizovana je i dodjela pehara u restoranu “Rudar”, nakon čega se uz živu muziku i večeru nastavilo zajedničko druženje svih takmičara.



FILM „HILJADARKA“ SVJETSKU PREMIJERU DOŽIVIO U BANOVIĆIMA

OVACIJE BANOVIĆKE PUBLIKE GLAVNIM AKTERIMA FILMA

Šlag na kraju sadržajne i dobro organizovane svečanosti povodom Dana općine Banovići bila je svjetska premijera dugo očekivane bh komedije „Hiljadarka“, čije je predstavljanje građanima Banovića obilježeno simboličnim rudarskim zelenim tepihom i popraćeno spektakularnim vatrometom.

„Hiljadarka“ je svjetski hit. Potvrdili su to i mnogobrojni građani, koji su do posljednjeg mjesta ispunili Pozorišnu salu Radničkog doma i pomno pratili svaki kadar filma nastalog na ovim prostorima. Kako su Banovići bili idealno mjesto za ovakav projekat u svom govoru potvrdio je i producent filma Almir Šahinović, koji je naveo da Banovići nisu odabrani slučajno. Rudarski gradić koji posjeduje idilična mjesta, kapacitete i potencijale upravo je bio potreban za ovakvo ostvarenje. Ipak najveći utisak na njega ostavili su građani Banovića, rudari kao najbolji statisti uvijek nasmijani, vedri i vrijedni ljudi.


Da se u Banovićima zaista održava svjetska premijera i da su te noći Banovići bili centar zbivanja dokaz su i mnoge regionalne medijske kuće, koje su po kiši i hladnom vremenu nestrpljivo čekale da se, ovaj put, na zelenom tepihu pojave glavni akteri i prenesu svoje utiske o filmu. Tako je Moamer Kasumović u svojoj izjavi hvalio ovo filmsko ostvarenje, te istakao da se premijera i trebala desiti u Banovićima. Za njega je ovo grad koji je dao dušu i srce za film,

gostoprimstvo građana se i danas pamti.

Nakon premijere producent filma Almir Šahinović uručio je zahvalnice svima koji su dali neki doprinos u realizaciji ovog projekta, naglašavajući da bez Banovića, njegovih stanovnika i RMU „Banovići“ film u potpunosti ne bi uspio.

Film ima sve tehničke i autorske kvalitete da postane jedno prvorazredno ostvarenje, a već sada je uvršten u zvanične selekcije festivala. Karakterišu ga jake emocije o životu i radu rudara u jednom teškom životnom periodu.

Naime „Hiljadarka“ je film Nenada Đurića koji prati sudbinu rudara Atifa Kurtovića, odabranog da svojim likom ukrasi novčanicu od 1.000 dinara. Nakon susreta sa Titom i vraćanja u svoje rudarsko mjesto, Atif se zaljubljuje u lijepu djevojku sumljivog morala zvanu Hiljadarka, koja je ime dobila po cijeni pružanja usluga državnim službenicima. Avantura za Atifa i njegove sugrađane počinje od momenta kada Tito najavi dolazak u njihov grad. Radnja se odvija davne 1955. godine u bosanskom gradiću u doba komunizma.



SVE UČESTALIJE POSJETE LJUBITELJA ŽELJEZNICA

Poslije intenzivnog rada tokom ljeta kada je banovički Muzej rudarstva dobio i svoje prve eksponate, radovi su na kratko stali. Do kraja godine dopremit će se još neki sitni dijelovi, a preostali eksponati sačekat će povoljnije vremenske uslove.

Da zainteresovanost za ovaj projekat postoji dokaz su i sve učestalije posjete ljubitelja rudarstva i željeznica. Tako je nedavno u posjeti Banovićima bila i francuska ambasadorica u BiH Claire Bodonyi, koju je tehnički direktor Rudnika dr. Ibrahim Lapandić upoznao sa do sada provedenim aktivnostima na realizaciji projekta Muzeja. Da je oduševljena do sada urađenim na projektu Muzeja dokaz je i to što je svoj ponovni dolazak najavila po završetku radova i samom otvaranju, na koji neće dugo čekati. U drugoj polovini slijedeće godine ljubitelji rudarstva i željeznica imat će priliku zaviriti u davnu historiju banovičkih rudnika, jer će upravo u tom periodu Muzej dobiti svoju potpunu sliku.

Fotografijama je prikazan dosadašnji rad, od ideje, do danas kada Muzej polako dobija svoj identitet.



Kod kuće je najbolje.



Akcija kredita

Dodite da nađemo najbolje rješenje za Vas.

POSEBNA PONUDA PROIZVODA I USLUGA ZA VAŠE ZAPOSLENIKE

DOPUŠTENO PREKORAČENJE PO TEKUĆEM RAČUNU u visini do 3 prosječna redovna mjesečna priliva ostvarena u zadnja tri mjeseca.

U nastavku donosimo pregled pogodnosti nove akcije kredita UniCredit Bank: „Kod kuće je najbolje!“

HIPOTEKARNI KREDITI

Vrsta kredita	Maks iznos kredita u KM	Maks rok otplate	Omjer kredita i hipoteke	Kamatna stopa (godišnja)	EKS*
STAMBENI KREDIT S HIPOTEKOM	300.000	30 godina	već od 1:1	5,50%	za FBIH i DB 5,68%, za RS 5,73%
GOTOVINSKI HIPOTEKARNI KREDIT	200.000	20 godina	1:1,5	5,95%	za FBIH i DB 6,18%, za RS 6,26%

- **Bez naknade** za obradu kredita
- **Bez naknade** za vođenje kreditnog računa
- **Fiksna** kamatna stopa na kredite s rokom otplate do i uključujući 5 godina, a promjenjiva za rokove otplate preko 5 godina
- Krediti se odobravaju u valuti KM s valutnom klauzulom u EUR
- Ukupni troškovi koji padaju na teret klijenta koji ulaze u izračun EKS za maksimalan iznos i na maksimalan rok po promjenljivoj kamatnoj stopi za stambene kredite sa hipotekom iznose za FBIH i DB 316.083,93 KM, a RS 317.430,04 KM, a za gotovinske hipotekarne kredite iznose za FBIH i DB 144.496,80 KM, a RS 145.842,91 KM

GOTOVINSKI KREDITI

Vrsta kredita	Maks iznos kredita u KM	Maks rok otplate	Kamatna stopa (godišnja)
OSIGURANI KREDIT (uz policu osiguranja otplate u slučaju bolovanja, otkaza ili smrti)	50.000	5 godina	5,99% fiksna (EKS* za FBIH i DB 7,87%, za RS 7,89%)
		10 godina	7,49% promjenjiva (EKS* za FBIH i DB 8,79%, za RS 8,80%)

- **Bez naknade** za vođenje kreditnog računa
 - Kredit se odobrava u valuti KM ili KM s valutnom klauzulom u EUR
 - Ukupni troškovi koji padaju na teret klijenta koji ulaze u izračun EKS za maksimalan iznos i na maksimalan rok po promjenljivoj kamatnoj stopi iznose za FBIH i DB 23.596,62 KM, a RS 25.615,98 KM
- *Efektivna kamatna stopa (EKS) je kamatna stopa koja odražava sve troškove kredita, uključujući redovnu i interkalarnu kamatu obračunatu na ukupan iznos kredita i maksimalan rok otplate, za klijente koji posjeduju tekući račun u UniCredit Bank d.d.
Razlika u izračunu EKS za Federaciju Bosne i Hercegovine/Distrikt Brčko i Republiku Srpsku proizlazi iz različite zakonske regulative koja definiše troškove koji ulaze u izračun EKS i ukupnih troškova kredita. U izračun EKS na području Federacije Bosne i Hercegovine i Distrikta Brčko ulazi naknada za obradu kredita i troškovi polise osiguranja (otplate i nekretnine). U izračun EKS na području RS, pored navedenih troškova, ulaze još i troškovi instrumenata osiguranja (mjerice, saglasnosti o zapljeni, troškovi vezani za realizaciju hipoteke). Banka zadržava pravo individualne procjene mogućnosti odobrenja maksimalnog iznosa kredita, ovisno o internim aktima.

Posjetite nas u našoj Poslovnici u **Ulici Oslobođenja br 22, 75270 Živinice** (više informacija možete dobiti na telefon: **035/ 743-143**) ili u drugoj Vama najbližoj poslovnici.

Sa zadovoljstvom Vas očekujemo. Vaša UniCredit Bank